

TE TIAKI TAMARIKI I MURI I TŌ KŌRUA WEHETANGA

TE WHAKARITE I NGĀ WHAKARITENGA PAI RAWA MŌ Ō TAMARIKI

HE WHAKARĀPOPOTOTANGA ANAKE TĒNEI. MŌ ĒTAHI ATU TAIPITOPITO, HAERE KI TE [JUSTICE.GOVT.NZ/FAMILY/CARE-OF-CHILDREN](https://www.justice.govt.nz/family/care-of-children)

Ina wehe kōrua, ko te tikanga ko ō tamariki te mea nui katoa. He pai ake mō ngā tāngata whai pānga katoa mēnā ka oti te whakarite i te tiaki ia rā o ō tamariki me ngā whakaritenga whai wāhi me te kore haere ki te kōti. Ka tau te wairua o ngā tamariki i roto i te wehenga mēnā kei te mōhio rātau kei te mahi tahi te hunga tiaki i a rātau.

Ngā whakaaetanga tiaki tamariki

E whakatakoto ana tētahi whakaaetanga tiaki tamariki i ngā whakatau i whakaae atu koe, ā, ko te tikanga:

- ngā whakaritenga mō te tiaki ia rā – ka hiahia pea koe kia ōrite te mana tiaki o ia rā, ka riro rānei te tiaki i tētahi mō te nuinga o te wā, te katoa rānei
- ngā whakaritenga whai wāhi – mēnā kei a koe ngā tamariki i te nuinga o te wā, kei roto i te whakaaetanga e kī ana ka pēhea te whai wā o tētahi atu matua ki a rātau, tae atu ki ngā huritau, ētahi atu rā nui, te Kirihimete, hararei hoki
- ētahi atu take tiaki tamariki – kei roto i tēnei ko ngā momo whakatau pēnei, ka haere ngā tamariki ki hea kura ai, ngā mahi i muri i te kura, tō rātau whakapono, whakamaimoa hauora, ō rātau ingoa hoki.

Ko te waihanga mahere tiaki tamariki, he aratohu ngāwari tēnei hei āwhina pea i a koe ki te wherawhera me te tuhi i aua whakatau.

Mō te whiwhi i tētahi tārua, me pātai atu ki tō Kōti Whānau tūtata, imēra rānei ki publications@justice.govt.nz

Mēnā ka taea ngā whakaritenga tiaki tamariki te whakaae tahi ka mutu kei te rata kōrua ki tā kōrua i whakaae ai, kāore he mahi atu anō mā kōrua (engari rawa mēnā ka hiahia kōrua kia 'whakamanahia' tō whakaaetanga e te kōti mā te whakarite hei Whakatau Tiaki Tamariki Whakaae Tahi).

Ngā ratonga hei āwhina i a koe

Mēnā kei te hiahia āwhina koe kia eke ai he whakaaetanga, he maha ngā ratonga ture whānau hei āwhina i a koe, tae atu ki te Ratonga Tohutohu Ture Whānau, te akoranga Te Tiaki Tamariki i te Wā o te Wehenga me te Whakatau Raruraru ā-Whānau.

TE RATONGA TOHUTOHU TURE WHĀNAU

Ka taea e koe te tiki tohutohu a tētahi rōia whānau ahakoa te wā. Ka taea pea te tiki tohutohu ture i te tuatahi me te āwhina mō te koreutu mēnā ka āhei atu koe ki ngā ratonga whai pūtea a te kāwanatanga.

Mēnā kei te āhei atu koe ki te ratonga whai pūtea, ka taea tētahi rōia te kōrero ki a koe mō ō tika kawenga ā-ture me ō huarahi ki a koe. I tua atu i tēnei, ki te hiahia koe ki te haere ki te kōti, mēnā kua tāpaehia mai rānei tētahi Whakatau Tiaki Tamariki ki a koe ka taea e rātau koe te āwhina ki te whakakī i ngā puka kōti.

TE TIAKI TAMARIKI I TE WĀ O TE WEHENGĀ – HE

AKORANGA RATO KŌRERO TIAKI TAMARIKI KOREUTU

He kaupapa rato kōrero koreutu te Tiaki Tamariki i te Wā o te Wehenga hei āwhina i a koe kia piki tō mōhio me tō kaha ki te whakatutuki i ngā hiahia o ō tamariki. Mō te hunga e whakapau kaha ana ki te whakarite i ngā whakaritenga mō ngā tamariki tēnei akoranga, engari ka haere ngā mātua kei te wehe ki ētahi akoranga kē.

E 4 haora te roa o te akoranga. Ka whakaratohia ki ngā rōpū whāiti, ā, ka kapi i ēnei kaupapa:

- he pēhea te pānga o te wehenga ki ngā tamariki
- he aha ngā mea pai rawa ki ngā tamariki ki te kore e noho tahi ō rātau mātua
- ngā āwhina mō te whakarite i tēnei āhuatanga, ā, me pēhea te waihanga i tētahi mahere tiaki tamariki.

TE WHAKATAU RARURARU Ā-WHĀNAU (TAKAWAENGA)

Ki te kore e tau he whakaritenga i waenga i a kōrua mō ā kōrua tamariki, i waihangatia te ratonga Whakatau Raruraru ā-Whānau (Takawaenga) hei āwhina i a koe kia eke he whakaritenga me te kore haere ki te kōti. Ko te tikanga ko ngā mātua anake kei roto engari ka uru mai anō pea te whānau whānui, mēnā kei te tiaki anō rātau i te tamaiti. Ka whakarongo tētahi kaitakawaenga matatau ki ngā tāngata katoa me te āwhina i a koe ki te whakatau i te whakaaetanga e tino pai ana mō ō tamariki.

Ko tā tō kaitakawaenga he:

- whakarite kei te tika te takawaenga ki a koe – i ētahi āhuatanga, pēnei i te whakarekerekere ā-whare, kāore e tika

- whakatau mēnā me kōrero kōrua, tētahi rānei, ki tētahi tumu kōrero hei whakapakari i a koe mō utu ki te kaupapa takawaenga (e kīia ana tēnei ko 'Te Takatū mō te Takawaenga')
- tuku i te hunga katoa e whai wāhi ana ki te tuku whakaaro mai.

Kāore tō takawaenga e:

- whakapau kaha ki te tūhono anō i a kōrua
- whakawā ko wai ō kōrua kei te tika, kei te hē rānei
- whakatau tikanga mō kōrua.

TE TAKATŪ MŌ TE TAKAWAENGA

Tērā pea kei te riri rawa koe, kei te pōkaikaha rānei, ki te āta whakaaroaro mō ngā mea pai rawa mō ō tamariki. Ki te pēnei, ka kī atu pea tō takawaenga me kōrero ki tētahi tumu kōrero hei whakapakari i a koe mō utu ki te kaupapa takawaenga (tirohia 'Te Takatū mō te Takawaenga').

Mō ētahi atu kōrero mō ēnei ratonga, haere ki te justice.govt.nz/family/care-of-children/

Ngā utu

Mēnā he iti noa tō moni whiwhi, tērā pea kāore koe e mate ki te utu mō Ngā Tohutohu Ture Whānau, te Whakatau Raruraru ā-Whānau, te Takatū mō Takawaenga rānei. **Hei rapu kōrero** mēnā kei te āhei atu koe ki te katoa o ngā pūtea, haere ki te justice.govt.nz/family/care-of-children/when-you-dont-agree/funding-eligibility/

waea rānei ki 0800 2 AGREE (0800 224 733).

Ka whakaū anō te rōia, kaitakawaenga rānei e kōrero ai koe mēnā kei te āhei atu koe.

Ki te kore koe e āhei atu ki te katoa o te pūtea, ka taea tonutia te whakamahi te Whakatau Raruraru ā-Whānau mō te \$897 (kei roto te GST) te utu. Ka wehea te utu i waenga i te hunga ka whai wāhi mai ki te takawaenga.

Ki te kore tonu koe e whakaae

Ki te kore tonu koe e whakaae ki ngā whakaritenga tiaki tamariki, ka taea e koe te tono ki te Kōti Whānau mā tētahi kaiwhakawā hei whakatau. E kīia ana tēnei ko te tono mō tētahi Whakatau Tiaki Tamariki. I te nuinga o te wā, me haere koe ki tētahi kaupapa Tiaki Tamariki i te Wā o te Wehenga me te whakamātau i te Whakatau Raruraru ā-Whānau i mua i tō tono ki te kōti.

Mō ētahi atu kōrero mō ō kōwhiringa ki te kore koe e whakaae, haere ki te justice.govt.nz/family/care-of-children/when-you-dont-agree/

Ki te kore koe e haumaru

Ki te noho mōrearea koe, ō tamariki rānei ki te whakarekereke ā-whare, me waea ki Ngā Pirihimana i 111.

Ētahi atu kōrero

Te Whakatau Raruraru ā-Whānau, Ratonga Tohutohu Ture Whānau, Te Tiaki Tamariki i te Wā o te Wehenga

justice.govt.nz/family/care-of-children/find-a-service-to-help-with-disputes/

Tūtohi āhei ki te pūtea

justice.govt.nz/family/care-of-children/when-you-dont-agree/funding-eligibility/

Te pukaiti waihanga mahere tiaki tamariki

justice.govt.nz/family/care-of-children/resources/

Waea 0800 2 AGREE (0800 224 733)

Īmēra pcs.family@justice.govt.nz